

摘藻堂四庫全書薈要

經部

欽定四庫全書薈要

經部

春秋集解卷十四



欽定四庫全書薈要卷一千三百九十八

經部

春秋集解卷十四

宋 呂本中 撰

文公

九年春毛伯來求金

左氏傳毛伯衛來求金非禮也不書王命未葬也

公羊傳毛伯者何天子之大夫也何以不稱使當喪
未君也踰年矣何以謂之未君即位矣而未稱王

也未稱王何以知其即位以諸侯之踰年即位亦知天子之踰年即位也以天子三年然後稱王亦知諸侯於其封內三年稱子也踰年稱公矣則曷為於其封內三年稱子緣民臣之心不可一日無君緣終始之義一年不二君不可曠年無君緣孝子之心則三年不忍當也毛伯來求金何以書譏何譏爾王者無求求金非禮也

穀梁傳求車猶可求金甚矣

伊川先生解家父致命以徵車故書使來求毛伯風
魯以欲金故不云王使

武夷胡氏傳毛伯天子大夫何以不稱使當喪未君
也踰年即位矣何以言未君古者諒陰三年百官
總己以聽於冢宰夫百官總己以聽則是冢宰獨
專國政之時託於王命以號令天下夫豈不可而
不稱使春秋之旨微矣非特謹天下之通喪所以
示後世大臣當國秉政不可擅權之法戒也跋扈

之臣假仗主威脅制中外凡有所行動以詔書從事蓋未有以春秋此義折之耳

襄陵許氏曰王室大喪諸侯莫賻是以有求金馬書之非特王之譏也所以徧刺天下之諸侯

夫人姜氏如齊

二月叔孫得臣如京師

左氏傳莊叔如周葬襄王

穀梁傳京大也師衆也言周必以衆與大言之也

辛丑葬襄王

陸氏纂例曰七月始葬

高郵孫氏曰春秋天王書葬者五君往者三臣往者
二君往者不書公如京師常事得禮法所當略也
臣往者悉書其人以為天王之喪君不自往而使
臣焉則是無君父之恩而廢臣子之禮

晉人殺其大夫先都

并解在下文
箕鄭父下

三月夫人姜氏至自齊

劉氏傳夫人曷為或致或不致或可以致或不可以致曷為或可以致或不可以致出入以禮則可以致出入不以禮則不可以致此其為有禮奈何父母在而歸寧也

武夷胡氏傳夫人與君敵體同主宗廟之事出必告行反必告至則書於策然適他國者或曰享或曰會或曰如衆矣未有致之者則其行非禮以不致見其罪也出姜如齊以寧父母於禮得行矣其致

者非特以告廟書耳夫人初歸豈其不告為文公越禮故削而不書示誅意之法矣今此書至者又以見小君之重也夫承祭祀以為宗廟主一國之母儀而可以搖動乎出姜至是蓋不安於魯故至而特書以示防微杜漸之意其為世慮深矣

晉人殺其大夫士穀及箕鄭父

左氏傳八年夷之蒐晉侯將登箕鄭父先都而使士穀梁益耳將中軍先克曰狐趙之勲不可廢也從

之先克奪蒯得田於葦陰故箕鄭父先都士穀梁益耳蒯得作亂九年春王正月己酉使賊殺先克乙酉晉人殺先都梁益耳三月甲戌晉人殺箕鄭父士穀蒯得

武夷胡氏傳殺先都士穀國也其稱人以殺者國亂無政衆人擅殺之稱也何以知其非討賊之詞書殺其大夫則知之矣三大夫皆強家也求專晉不得挾私怨以作亂而使賊殺其中軍佐則固有罪

矣曷為不去其官當是時晉靈初立主幼不君政
在趙盾而中軍佐者盾之黨也若獄有所歸則此
三人者獨無可議從末減乎而皆殺之是大夫專
生殺而政不自人主出也故不稱國討不去其官
而箕鄭父書及示後世司賞罰者必本忠恕無有
黨偏之意其義精矣

楚人伐鄭

左氏傳范山言於楚子曰晉君少不在諸侯北方可

圖也楚子師於狼淵以伐鄭囚公子堅公子龍及樂耳鄭及楚平

泰山孫氏曰楚復強也楚自城濮之敗不敢加兵於鄭今伐鄭者晉文既死中國不振故也

公子遂會晉人宋人衛人許人救鄭

左氏傳公子遂會晉趙盾宋華耦衛孔達許大夫救鄭不及楚師卿不書緩也以懲不恪

武夷胡氏傳書救而稱人以罪趙盾之不能折衝消

患為夷狄之所窺也

夏狄侵齊

秋八月曹伯襄卒

九月癸酉地震

公羊傳地震者何動地也何以書記異也

冬楚子使椒

穀作
荻

來聘

左氏傳冬楚子越椒來聘

公羊傳椒者何楚大夫也楚無大夫此何以書始有

大夫也始有大夫則何以不氏許夷狄者不一而足也

劉氏傳聘常事也其曰椒何楚進也楚進久矣曷為始乎此自是與中國通也與中國通者何自是以中國之禮為之者也

武夷胡氏傳楚僭稱王春秋之始獨以號舉夷狄之也中間來聘改而書人漸進之矣至是其君書爵其臣書名而稱使遂與諸侯比者是以中國之禮

待之也所謂謹華夷之辨內諸夏而外四夷義安在乎曰吳楚聖賢之後見周之弱王靈不及僭擬名號此以夏而變於夷者也聖人重絕之夫春秋立法謹嚴而宅心忠恕嚴於立法故僭號稱王則深加貶黜必攘斥之以正君臣之義恕以宅心故內雖不使與中國同外亦不使與夷狄等思善悔過向慕中國則進之而不拒此慎用刑重絕人之意也噫春秋之所以為春秋非聖人莫能修之者

乎

秦人來歸僖公成風之襚

穀梁傳秦人弗夫人也即外之弗夫人而見正焉

陸氏纂例啖子曰僖公成風與惠公仲子何殊傳謂
兩人誤也

泰山孫氏曰妾母稱夫人自僖公始天子不能正而
秦人能之故曰秦人來歸僖公成風之襚此固周
室陵遲典禮錯亂秦人之不若也

葬曹共公

十年春王三月辛卯臧孫辰卒

夏秦伐晉

左氏傳春晉人伐秦取少梁夏秦伯伐晉取北徵

伊川先生解禮飾回增美質失之則為禽獸聖人
初恐人之入于禽獸也故春秋之法極謹嚴中國
而用夷禮則便深貶之

高郵孫氏曰以其易世相讐交攻不已故不稱其人

但曰秦者狄之也

楚殺其大夫宜申

左氏傳楚子西謀弑穆王穆王聞之五月殺鬬宜申
武夷胡氏傳案左氏宜申與仲歸謀弑穆王而誅則
是討弑君之賊也曷為稱國以殺又書其官而不
曰楚人殺宜申乎曰穆王者即楚世子商臣也而
春秋之義微矣

自正月不雨至于秋七月

穀梁傳歷時而言不雨文不閔雨也不閔雨者無志
乎民也

及蘇子盟于女栗

杜氏注蘇子周卿士女栗地闕

劉氏傳孰及之公也公則曷為不言公不與公盟也
曷為不與公盟古者內諸侯不外交外諸侯不內
交有至尊在不貳之也

冬狄侵宋

楚子蔡侯次于厥

公作

貉

左氏傳陳侯鄭伯會楚子于息冬遂及蔡侯次于厥貉將以伐宋宋華御事曰楚欲弱我也先為之弱乎何必使誘我我實不能民何罪乃逆楚子勞且聽命

高郵孫氏曰厥貉之次遂稱楚子而明年伐麋又以爵書蓋自是與中國等矣楚蠻荆而中國與之等則蠻荆益強而中國之衰益甚矣

武夷胡氏傳楚滅江六平陳與鄭於是乎為伐宋之
舉次于厥貉凡伐而次者其次為善次而伐者其
次為貶齊師次陘修文告以威敵善之也故上書
伐楚以著其美楚次厥貉藏禍心以憑夏貶之也
故下書伐麋以著其罪當是時陳鄭宋皆從楚矣
獨書蔡侯何哉鄭失三大夫俟救而不及陳獲公
子茂而懼宋方有狄難蓋有不得已者非所欲也
蔡無四境之虞則是得已不已志在乎從楚矣故

削三國書蔡侯見其棄諸夏之惡也

十有一年春楚子伐麇

公作圖

左氏傳十年厥貉之會麇子逃歸十一年春楚子伐麇成大心敗麇師於防渚潘崇復伐麇至于錫穴襄陵許氏曰楚侵伐書爵始此中國日替矣

夏叔仲彭生會晉卻缺于承匡

左氏傳叔仲惠伯會晉卻缺于承匡謀諸侯之從於

楚者

杜氏注九年陳鄭及楚平十年宋聽楚命

杜氏注承筐宋地在陳留襄邑縣西卻缺冀缺

秋曹伯來朝

左氏傳秋曹文公來朝即位而來見也

公子遂如宋

左氏傳襄仲聘於宋且言司城蕩意諸而復之因賀

楚師之不害也

狄侵齊

冬十月甲午叔孫得臣敗狄于鹹

左氏傳鄆瞞侵齊

杜氏注鄆瞞狄國名防風之後秦姓

遂伐我公卜使

叔孫得臣追之吉侯叔夏御莊叔繇房甥為右富父終甥駟乘冬十月甲午敗狄于鹹獲長狄僑如富父終甥撻其喉以戈殺之

公羊傳長狄也

杜氏注鹹魯地

劉氏意林非長狄乎曰非也春秋正名狄也戎也淮夷也白狄也赤狄也山戎也夷蠻也陸渾戎也姜

戎也是不一名

十有二年春王正月郕

公作盛

伯來奔

左氏傳十一年郕太子朱儒自安於夫鍾國人弗徇
十二年春郕伯卒郕人立君太子以夫鍾與郕邾
來奔公以諸侯逆之

辨疑趙子曰案諸侯嗣位未踰年猶稱子豈有君父
病而不視死而不喪身未即位以邑出奔而稱郕
伯一何乖繆且鄭忽曹羈莒展皆已即位及其出

奔猶但稱名況於郕未嗣位乎且春秋正王綱之節乃云為魯公以諸侯迎之之故即書曰郕伯乃春秋柰王綱也一何厚誣邪劉氏權衡意者先郕伯以去年卒太子今即位而不能自安遂出奔此乃真郕伯矣以其即位日淺或謂之太子而左氏則誤以為太子出奔也

公羊傳失地之君也

泰山孫氏曰諸侯播越失地皆名此不名者非自失

國也案莊八年師及齊師圍邾邾降于齊師自是齊為附庸此而來奔齊所偁爾故不名

常山劉氏曰太子位當世立國人弗立而來奔聖人即書其爵以其當立為君也邾人豈可絕之哉春秋大居正王道若此豈有亂乎

杞伯來朝

左氏傳杞桓公來朝始朝公也且請絕叔姬而無絕婚公許之

杜氏注復稱伯舍夷禮

三月庚子子叔姬卒

左氏傳二月叔姬卒不言杞絕也

陸氏纂例趙子曰時君之女故曰予以別非先君之女也

高郵孫氏曰左氏經無子字

夏楚人圍巢

左氏傳羣舒叛楚夏子孔執舒子平及宗子遂圍巢

杜氏注巢吳楚間小國廬江六縣東有居巢城

秋滕子來朝

左氏傳滕昭公來朝亦始朝公也

秦伯使術

公作遂

來聘

左氏傳秦伯使西乞術來聘且言將伐晉襄仲辭王曰君不忘先君之好照臨魯國鎮撫其社稷重之以大器寡君敢辭王對曰不腆敝器不足辭也主人三辭賓答曰寡君願徼福於周公魯公以事君

不腆先君之敝器使下臣致諸執事以為瑞節要結好命所以藉寡君之命結二國之好是以敢致之襄仲曰不有君子其能國乎國無陋矣厚賄之辨疑曰案例外大夫來魯未命者皆書名無他義也冬十有二月戊午晉人秦人戰于河曲

左氏傳秦為令狐之役故冬秦伯伐晉取羈馬晉人禦之趙盾將中軍荀林父佐之卻缺將上軍臾駢佐之欒盾將下軍胥甲佐之范無恤御戎以從秦

師于河曲史駢曰秦不能久請深壘固軍以待之
從之秦人欲戰秦伯謂士會曰若何而戰對曰趙
氏新出其屬曰史駢實為此謀將以老我師也趙
有側室曰穿晉君之壻也有寵而弱不任軍事好
勇而狂且惡史駢之佐上軍也若使輕者肆焉其
可十二月戊午秦軍掩晉上軍趙穿追之不及反
怒以其屬出宣子曰秦獲穿也獲一卿矣秦以勝
歸我何以報乃皆出戰交綏秦行人夜戒晉師曰

兩軍之士皆未愁也明日請相見也史駢曰使者目動而言肆懼我也將遁矣薄諸河必敗之胥甲趙穿當軍門呼曰死傷未收而棄之不惠也不待期而薄人於險無勇也乃止秦師夜遁復侵晉入瑕

伊川先生解凡戰皆以主人及客秦曲故不云晉及杜氏注河曲在河東蒲坂縣南

陸氏纂例趙子曰凡戰不書及交為主也

如秦初伐晉而退而

晉復追之至河
曲而戰之類也

武夷胡氏傳秦伯親將晉上卿趙盾禦之其稱人何
為令狐之役故也秦納不正遂非積忿晉不謝秦
潛師禦之是以暴兵連禍至此極也凡戰皆以主
人及客者處己之道寡怨之方王者之事其不書
晉及何也前年秦師來伐晉不言戰者晉已服矣
故狄秦而免晉今又為此役則秦曲甚矣故不以
晉為主惟動大衆從秦師不奉詞令以止之也故

貶而稱人此輕重之權衡也

季孫行父帥師城諸及鄆

公作運

左氏傳書時也

杜氏注鄆莒魯所爭者城陽姑幕縣南有負亭須即
鄆也

十有三年春王正月

夏五月壬午陳侯朔卒

邾子蘧蒢卒

左氏傳邾文公卜遷於繹史曰利於民而不利於君
邾子曰苟利於民孤之利也遂遷於繹五月邾文
公卒君子曰知命

自正月不雨至于秋七月

大

公作世

室屋壞

左氏傳秋七月大室之屋壞書不共也

公羊傳世室屋壞世室者何魯公之廟也周公稱大
廟魯公稱世室羣公稱宮魯祭周公何以爲牲周

公用白牡魯公用騂剛羣公不毛魯祭周公何以
為盛周公盛魯公燾羣公廩世室屋壞何以書譏
何譏爾久不修也

穀梁傳大室猶世室也周公曰大廟伯禽曰大室羣
公曰宮為社稷之主而先君之廟壞極稱之志不
敬也

杜氏注大廟之室

常山劉氏曰觀春秋之中文公事宗廟最為不謹遂

有大室屋壞之變天人之際可不畏哉

呂氏曰君子之於宗廟有所須不敢忘者非以崇孝而厚遠也孝子之於親心固如是也推是心以為政雖不中不遠矣魯之為國至使大室屋壞其能有以及物乎

冬公如晉衛侯會公于沓

公無公字

高郵孫氏曰沓之會公也已去魯而未至於晉也

狄侵衛

十二月己丑公及晉侯盟公

公穀無
公字

還自晉鄭伯會公

于棐

公作
斐

左氏傳冬公如晉朝且尋盟衛侯會公于沓請平於
晉公還鄭伯會公于棐亦請平於晉公皆成之

公羊傳還者何善辭也何善爾往黨衛侯會公于沓
至得與晉侯盟反黨鄭伯會公于棐故善之也

何氏

注黨所也所猶
時齊人語也

杜氏注棐鄭地

十有四年春王正月公至自晉

邾

公作邾
意下同

人伐我南鄙叔仲彭生帥師伐邾

左氏傳邾文公之卒也公使弔焉不敬邾人來討伐
我南鄙故惠伯伐邾

夏五月乙亥齊侯潘卒

左氏傳子叔姬妃齊昭公生舍叔姬無寵舍無威公
子商人驟施而多聚士盡其家貸於公有司以繼
之夏五月昭公卒舍即位

六月公會宋公陳侯衛侯鄭伯許男曹伯晉趙盾癸酉
同盟于新城

左氏傳邾文公元妃齊姜生定公二妃晉姬生捷菑
文公卒邾人立定公捷菑奔晉六月同盟于新城
從於楚者服且謀邾也

穀梁傳同者有同也同外楚也

伊川先生解諸侯始會議合而後盟盟者志同故書
同同外楚也

杜氏注新城宋地在梁國穀熟縣西

武夷胡氏傳同盟于新城同外楚也其曰同者志諸
侯同欲非強之也而宋公陳侯鄭伯在焉則知楚
次厥貉三國雖從誠有勿獲已者削而不書蓋怨
之也蔡不與盟果有服事楚國之實矣夷攷晉楚
行事未有以大相遠也而春秋予奪如此者荆楚
僭王若與同好陵蔑中華是將代宗周為共主君
臣之義滅矣可不謹乎

秋七月有星孛入于北斗

公羊傳孛者何彗星也其言入于北斗何北斗有中

也

中者
魁中

何以書記異也

穀梁傳孛之為言猶彗也其曰入北斗斗有環域也
高郵孫氏曰星孛之異經書者三而皆曰有也有者
不宜有之辭且不知其孛者何星闕所不知也

公至自會

晉人納捷

公作
接

留于邾弗克納

公作
邾婁

左氏傳晉趙盾以諸侯之師八百乘納捷菑于邾邾
人辭曰齊出獲且長宣子曰辭順而勿從不祥乃
還

穀梁傳是郤克也其曰人何也微之也何為微之也
長轂五百乘縣地千里過宋鄭滕薛復入千乘之
國欲變人之主至城下然後知何知之晚也弗克
納未伐而曰弗克何也弗克其義也捷菑晉出也
獲且齊出也獲且正也捷菑不正也

陸氏纂例其自以為君而來爭國者則不論命與不

命皆但名而已不言公子公孫言非復人臣也所

謂當國者也齊小白

莊九年

陽生

哀六年

邾捷菑

文十四年

莒去疾

昭元年

之類是也

陸氏微旨趙子曰弗克納言失之於初而得之於末

也愈乎遂也淳聞於師曰據三傳之說晉師皆有

名氏則必非微者矣書曰人何也曰廢置諸侯王

者之事人臣專之罪莫大焉夫子善其聞義能徙

故為之諱也凡事不合常禮而心可嘉者皆以諱為善

劉氏傳弗者遷辭也

武夷胡氏傳在易同人之九四曰乘其墉弗克攻吉象曰乘其墉義弗克也其吉則困而反則也其趙盾之謂矣聖人以改過為大過而不改將文過以遂非則有怙終之刑過而能悔不貳過以遠罪則有遷善之美其曰弗克納見私欲不行可以為難

矣然則何以稱人大夫而廢置諸侯非也聞義能徙故為之諱內以諱為貶外以諱為善

九月甲申公孫敖卒于齊

左氏傳穆伯之從已氏也魯人立文伯穆伯生二子於莒而求復三年而盡室以復適莒文伯卒立惠叔穆伯請重賂以求復惠叔以為請許之將來九月卒于齊告喪請葬弗許

劉氏傳大夫出奔曷為或卒或不卒或可以卒或可

以不卒曷為或可卒或可以不卒大夫去其宗廟
爵祿猶列於朝出入猶詔於國兄弟宗族猶存是
大夫而已矣卒之可也爵祿無列於朝出入無詔
於國兄弟宗族無存是非大夫而已矣卒之不可
也

劉氏意林教不循法度自絕於魯而猶卒之春秋不
以為非以為君臣之間厚莫重焉故君誠有禮於
其臣可以死可以亡君誠有恩於其臣則臣雖死

雖亡而不怨也若是而國家之禍亂遠矣

齊公子商人弑其君舍

左氏傳秋七月乙卯夜齊商人弑舍而讓元元曰爾求之久矣我能事爾爾不可使多蓄憾將免我乎爾為之齊人定懿公使來告難故書以九月穀梁傳舍未踰年其曰君何也成舍之為君所以重商人之弑也

陸氏微旨淳聞於師曰春秋之作本懲姦惡也若未

踰年之君被弑而不曰君則逆亂之臣皆以未踰年而肆其凶惡也故原其情以立此義晉奚齊本不正又里克不伐其位故異於此也

高郵孫氏曰人子之心則未踰年而稱子國人弑君則未踰年而稱君此春秋所以辨君臣之分而防篡弑之禍也

宋子哀來奔

左氏傳宋高哀為蕭封人以為卿不義宋公而出遂

來奔書曰宋子哀來奔貴之也

陸氏纂例奔亡之美者莫過于子哀

武夷胡氏傳宋昭公無道高哀為蕭封人以為卿不義宋公而出遂來奔書宋子哀貴之也易曰幾者動之微吉之先見者也君子見幾而作不俟終日宋子哀有焉昔微子去紂列於三仁之首子哀不立於危亂之邦而春秋書字謂能貴愛其身以存道也若偷生避禍而去國出奔亦何取之有

襄陵許氏曰大夫執雁義先去就如曹羈宋子哀蓋得之矣

冬單伯如齊齊人執單伯齊人執子叔姬

左氏傳單伯如齊請子叔姬齊人執之又執子叔姬公羊傳執者曷為或稱行人或不稱行人稱行人而執者以其事執也不稱行人而執者以己執也

劉氏傳子叔姬者何齊君舍之母也齊君舍之母則齊人何為執之公子商人弑其君而暴其母單伯

如齊請以歸曰殺其子焉用其母商人怒為是執之何以不稱行人或曰不稱行人者非其所為使也或曰附庸之君也生不名死不卒故執亦不稱行人也此一事也曷為再言齊人嫌也

常山劉氏曰商人弑君之惡已顯而執叔姬之事聖人不獨罪商人也齊人不討賊俱北面事之又致執其君之母齊人均有罪焉

武夷胡氏傳齊君舍魯之甥也商人弑舍固忌魯矣

魯使單伯如齊齊人意欲辱魯故執單伯并執子叔姬而誣之以罪不稱行人公羊所謂以已執之者也齊人懷商人之私惠忘君父之大倫弑其君而不能討執其母而莫之救則是舉國之人皆有不赦之罪也假有人焉正色而立於朝誰敢致難其君與執其母而不之顧乎故聖人書曰齊人執子叔姬所以窮逆賊之黨與而治之也其討賊之旨嚴矣故曰春秋成而亂臣賊子懼

十有五年春季孫行父如晉

左氏傳季文子如晉為單伯與子叔姬故也

襄陵許氏曰使魯能修其政則齊亂可以義討今反
遇辱而因晉以請為齊弱焉傳曰國家閒暇及是
時明其政刑雖大國必畏之矣前此魯亦暇矣而
豫怠僭差政刑不敕卒困於齊斯豈非自取侮哉
三月宋司馬華孫來盟

左氏傳宋華耦來盟其官皆從之

杜氏注古之盟會
必備威儀崇贊幣

賓主以成禮為敬故傳曰卿行旅從春秋時事多不能備儀華孫能率其屬以從古典所以敬事而重白公與之宴辭曰君之先臣督得罪於宋殤公請承命於亞旅

陸氏纂例趙子曰來盟彼欲之也啖子曰凡外臣來不言君使者皆有義

高郵孫氏曰華孫其君闇亂國事廢弛而賢臣外奔華孫懼鄰國之諸侯因其間隙而侵伐之於是來盟以紓其國之難春秋之大夫見於經者多矣其

以官舉者惟三人焉又皆在宋昭公之時也豈非禍亂之際則節義之士有以顯名於後歟

呂氏曰不言使自請之也稱司馬能其官也

夏曹伯來朝

齊人歸公孫敖之喪

左氏傳齊人或為孟氏謀曰魯爾親也飾棺寘諸堂
阜魯必取之從之卞人以告惠叔猶毀以為請立
於朝以待命許之取而殯之齊人送之書曰齊人

歸公孫敖之喪為孟氏且國故也葵視共仲

杜氏注大夫喪還不書善魯感子以赦父敦公族之恩崇仁孝之教

劉氏傳何以書譏何譏爾以大夫卒之而不以大夫終之非魯也制人之君臣使上不行乎下非齊也襄陵許氏曰以教之醜奔而錄卒錄其喪歸春秋為之屢見於經者以文伯惠叔之哀誠無已也易曰有子考无咎書曰尚盖前人之愆惟忠惟孝故聖

人以教著教焉

六月辛丑朔日有食之鼓用牲于社

左氏傳鼓用牲于社非禮也日有食之天子不舉伐鼓于社諸侯用幣于社伐鼓于朝以昭事神訓民事君示有等威古之道也

單伯至自齊

左氏傳齊人許單伯請而赦之使來致命

杜氏注以單伯執節

不移且畏晉故許之

穀梁傳大夫執則致致則名此其不名何也天子之命大夫也

晉卻缺帥師伐蔡戊申入蔡

左氏傳新城之盟蔡人不與晉卻缺以上軍下軍伐蔡曰君弱不可以怠戊申入蔡以城下之盟而還襄陵許氏曰言伐言入甚之

秋齊人侵我西鄙季孫行父如晉

左氏傳齊人侵我西鄙故季文子告于晉

冬十有一月諸侯盟于扈

左氏傳晉侯宋公衛侯蔡侯陳侯鄭伯許男曹伯盟于扈尋新城之盟且謀伐齊也齊人賂晉侯故不克而還於是有齊難是以公不會書曰諸侯盟于扈無能為故也

伊川先生解魯以備齊不在會故不序又稱諸侯者衆辭見衆國無能為也此盟為齊亂也

劉氏意林大者天地其次君臣道莫先焉晉為霸主

齊弑其君興侯而莫能正晉則固有罪矣諸侯又
莫之討不亦病乎夫諸侯不專征者也田恆弑簡
公而孔子請討焉是豈非義而孔子行之哉固以
謂天地之道君臣之義是乃其宜也從此觀之盟
于扈之意晉則固有罪而諸侯亦病矣

武夷胡氏傳盟于扈者晉侯宋公衛蔡陳鄭曹許八
國之君也何以不序略之也春秋於外裔君臣同
詞而不分爵號說者以為略之也八國曷為略之

等於外裔乎齊人弑君不能致討受賂而退奚以
賢於外裔矣不曰晉人會諸侯盟于扈而曰諸侯
盟者分惡於諸侯也田恆弑其君孔子沐浴而朝
告於哀公請討之弑君之賊夫人之所得討也而
況於諸侯乎況於鄰國乎略諸侯而不序以其欲
討齊罪而復不能也而況於鄰國初不與盟會者
乎魯君之罪亦可知矣

十有二月齊人來歸子叔姬

劉氏意林出夫人者未嘗不使大夫將命也彼其曰
鄭伯姬來歸此其曰齊人來歸子叔姬何哉曰春
秋正名別賢不肖使弗相亂者也義屈則屈義直
則直鄭伯姬以罪出雖父母於其子而不敢以私
愛害公義辭不教而已矣子叔姬以禍亂逐非得
罪於先君者也魯雖受之其義固可以自直故謂
之齊人來歸明罪之在也凡人之議法也所觀則
回所踈則察君子不然親則憐之而不以愛妨公

踈則容之而不以枉誣正所以見王者之事也

泰山孫氏曰齊人來歸子叔姬也商人既殺其子又絕其母甚矣

武夷胡氏傳春秋深罪齊人以商人為君而不知其惡故其執其歸與弑其君商人皆稱齊人深責之也

齊侯侵我西鄙遂伐曹入其郛

左氏傳齊侯侵我西鄙謂諸侯不能也遂伐曹入其

鄆討其來朝也

杜氏注鄆鄆也

襄陵許氏曰魯盡禮於晉而見侵弗恤曹修禮於魯而被伐莫救此仁義之所以日壞而兵革之所以方興夫豈特齊懿之暴戾無道皆晉靈趙盾之責也

十有六年春季孫行父會齊侯于陽穀齊侯弗及盟左氏傳春王正月及齊平公有疾使季文子會齊侯

于陽穀請盟齊侯不肯曰請俟君間

夏五月公四不視朔

左氏傳公四不視朔疾也

公羊傳曷為四不視朔公有疾也何言乎公有疾不

視朔自是公無疾不視朔也然則曷為不言公無

疾不視朔有疾猶可言也無疾不可言也

左氏曰公羊曰

自是無疾不視朔也定哀之間子貢欲去告朔之餼羊蓋不復視朔矣此公羊之所以為此言也然

而五月書四不視朔則六月視朔矣視朔之廢非始於此也

穀梁傳天子告朔於諸侯諸侯受乎禰廟禮也公四不視朔公不臣也以公為厭政已甚矣

杜氏注諸侯每月必告朔聽政因朝於廟今公以疾闕不得視二月三月四月五月朔也

武夷胡氏傳文公厭政備見於經閏不告朔不視無雨不閏會同不與廟壞不修作主不時事民治神之怠也則其心放而不知求久矣

六月戊辰公子遂及齊侯盟于鄆

公作屏
穀作師丘

左氏傳公使襄仲納賂於齊侯故盟于鄆丘

杜氏注鄆丘齊地

秋八月辛未夫人姜氏薨

左氏傳秋八月辛未聲姜薨

杜氏注僖公夫人文公母也

毀泉臺

公羊傳毀泉臺何以書譏何譏爾築之譏毀之譏先

祖為之已毀之不如勿居而已矣

穀梁傳毀泉臺喪不貳事貳事緩喪也以文為多失

道矣

范氏注緩作王躋倍公四不視朔毀泉臺之類

武事胡氏傳先祖為之非矣然臺之存毀非安危治亂之所係也雖勿居可也而必毀之是暴揚其失有輕先祖之心此履霜之漸弑父與君之萌春秋之所謹也故書

楚人秦人巴人滅庸

左氏傳楚大饑庸人帥羣蠻以叛楚麋人帥百濮聚

於選將伐楚於是申息之北門不啟楚人謀徙於
阪高蔣賈曰不可我能往寇亦能往不如伐庸夫
麋與百濮謂我饑不能師故伐我也若我出師必
懼而歸百濮離居將各走其邑誰暇謀人乃出師
旬有五日百濮乃罷自廬以往振廩同食次於句
澁使廬戢黎侵庸及庸方城庸人逐之囚于楊窻
三宿而逸曰庸師衆羣蠻聚焉不如復大師且起
王卒合而後進師叔白不可姑又與之遇以驕之

彼驕我怒而後可克先君蚡冒所以服陞隰也又
與之遇七遇皆北唯裨僚魚人實逐之庸人曰楚
不足與戰矣遂不設備楚子乘駟會師於臨品分
為二隊子越自石溪子貝自仞以伐庸秦人已人
從楚師羣蠻從楚子盟遂滅庸

冬十有一月宋人弑其君杵

公作處

臼

左氏傳宋公子鮑禮於國人宋饑竭其粟而貸之無
日不數於六卿之門國之材人無不事也親自桓

以下無不恤也襄夫人助之施昭公無道國人奉
公子鮑以因夫人冬十一月甲寅宋昭公將田孟
諸未至夫人王姬使帥甸攻而殺之蕩意諸死之
武夷胡氏傳此襄夫人使帥甸攻殺之也而書宋人
者昭公無道國人之所欲弑也君無道而弑之可
乎諸侯殺其大夫雖當於罪若不歸諸司寇猶有
專殺之嫌以為不臣矣況於北面歸戴奉之以為
君也故曰人臣無將將而必誅昭公無道聖人以

弑君之罪歸宋人者以明三綱人道之大倫君臣
之義不可廢也然則有土之君可以肆於民上而
無誅乎諸侯無道天子方伯在焉臣子國人其何
居死於其職而明於去就從違之義斯可矣蕩意
諸亦死職春秋削之不得班於孔父仇牧荀息何
也三子閑其君而見殺春秋之所取也意諸知國
人將弑其君而不能止知昭公之將見殺而不能
正坐待其及而死之所謂匹夫匹婦自經於溝瀆

而莫之知也奚得與死於其職者比乎聖人所以獨取高哀之去而書字以褒之也

十有七年春晉人衛人陳人鄭人伐宋

左氏傳晉荀林父衛孔達陳公孫寧鄭石楚伐宋討曰何故弑君猶立文公而還卿不書失其所也

伊川先生解行天討而成其亂失天職也故不卿之杜氏注自僖閔以下終於春秋陳侯常在衛侯上今大夫會在衛下傳不言陳公孫寧後至則寧位非

上卿故也

夏四月癸亥葬我小君聲

公作聖

姜

左氏傳葬聲姜有齊難是以緩

泰山孫氏曰聲諡也九月而葬

齊侯伐我西鄙六月癸未公及齊侯盟于穀諸侯會于
扈

左氏傳齊侯伐我北鄙襄仲請盟六月盟于穀晉侯
蒐于黃父遂復合諸侯于扈平宋也公不與會齊

難故也書曰諸侯無功也

武夷胡氏傳宋昭公雖為無道人臣將而必誅春秋
正宋人為弑君之罪所以明人道之大倫也故大
夫無沐浴之請則貶而稱人諸侯無討賊之功則
略而不序不然是廢君臣之義人欲肆而天理滅
矣故曰春秋成而亂臣賊子懼

秋公至自穀

冬公子遂如齊

左氏傳襄仲如齊拜穀之盟

十有八年春王二月丁丑公薨于臺下

穀梁傳臺下非正也

高郵孫氏曰人君之薨必於路寢非路寢者皆不正也其曰臺下蓋又甚焉

秦伯瑩卒

泰山孫氏曰秦康公

夏五月戊戌齊人弑其君商人

左氏傳齊懿公之為公子也與邴歆之父爭田勿勝
及即位乃掘而刖之而使歆僕納閭職之妻而使
職驂乘夏五月公遊於申池二人弑懿公納諸竹
中歸舍爵而行齊人立公子元

武夷胡氏傳案左氏齊懿公即位刖邴歆之父而使
歆僕納閭職之妻而使職驂乘二人者實弑懿公
然則於法宜書曰盜而特變其詞以為齊人何也
亂臣賊子之動於惡必有利其所為而與之者人

人不利其所欲為而莫之與則孤危獨立無以濟其惡篡弑之謀息矣惟利其所為而與之者衆是以能濟其惡天下胥為禽獸而莫之遏也公子商人驟施於國而多聚士盡其家而貸於公有司是以財誘齊國之人也齊人貪公子一時之私施而不顧君臣萬世之大倫弑其國君則覲面以為之臣而不能討執其君母則拱手以聽其所為而不能救故於懿公見殺特不書盜反以弑君之罪歸

諸齊人以誅亂賊之黨弭篡弑之漸所謂拔本塞源懲禍亂之所由也故曰春秋成而亂臣賊子懼
六月癸酉葬我君文公

秋公子遂叔孫得臣如齊

左氏傳秋襄仲莊叔如齊惠公立故且拜葬也

穀梁傳使舉上客而不稱介不正其同倫而相介故列而數之也

劉氏意林公子遂叔孫得臣如齊春秋之文有常有

變變用於變常用於常不相襲也變之甚微讀者
難知也則以為史耳乃春秋則欲起問者見善惡
也公子遂將弑君謀之齊而後決陽虎將竊國謀
之晉而後發而經書子卒盜竊寶玉大弓其實尚
隱故原其禍亂之始邪謀之發著之奉使之日以
見非常也使學者比其類揆其情因是而知之所
謂微而顯志而晦者也非聖人孰能修之哉齊與
人之大臣謀弑其君晉與人之陪隸謀覆其國意

俱惡而禍俱大此春秋所以異而惡之也

武夷胡氏傳使舉上客將稱元帥此春秋立文之常體也其有變文書介副者欲以起問者見事情也子赤夫人之子今卒於弑不著其實是為國諱惡無以傳信於將來而春秋之大義隱矣故上書大夫並使下書夫人歸于齊中曰子卒則見禍亂邪謀發於奉使之日而公子遂弑立其君之罪著矣冬十月子卒

左氏傳文公二妃敬嬴生宣公敬嬴嬖而私事襄仲

宣公長而屬諸襄仲襄仲欲立之叔仲不可仲見於齊侯而請之齊侯新立而欲親魯許之冬十月

仲殺惡及視而立宣公

杜氏注惡大子視其母弟

書曰子卒諱

之也仲以君命召惠伯其宰公冉務人止之曰人必死叔仲曰死君命可也公冉務人曰若君命可死非君命何聽弗聽乃入殺而埋之馬矢之中

公羊傳子卒者孰謂謂子赤也

陸氏纂例啖子曰凡未踰年君卒皆書曰卒言嗣先君未成君也故不書崩薨而曰卒先君未葬則名之既葬則不名外諸侯未踰年而卒則不書異於內也趙子曰子般子赤以被殺故不書地義與隱同子野非被殺而亦不書地闕文也

武夷胡氏傳諸侯在喪稱子繼世不忍當也既葬不名終人子之事也踰年稱君緣人臣之心也

夫人姜氏歸于齊

左氏傳夫人姜氏歸于齊大歸也將行哭而過市曰
天乎仲為不道殺適立庶市人皆哭魯人謂之哀
姜

穀梁傳惡宣公也有不待貶絕而罪惡見者

范氏注
直書姜

氏之歸則宣公罪
惡不貶而自見

有待貶絕而惡從之者姪娣者

不孤子之意也一人有子三人緩帶

高郵孫氏曰子赤見弑宣公立夫人姜氏不安于魯
而大歸于齊聖人書之曰子卒夫人姜氏歸于齊

然則宣公之弑不亦明歟

武夷胡氏傳書夫人則知其正書姜氏則知其非見
絕於先君書歸于齊則知其無罪異於孫于邾者
而魯國臣子殺嫡立庶敬嬴宣公不能事主君存
適母其罪不書而並見矣

季孫行父如齊

襄陵許氏曰文子之行告宣公立也前乎子卒書如
齊後乎子卒書如齊齊與聞乎故也所以惡齊也

呂氏曰君死不正而國之大臣恃大國以自免施施
肆肆無所忌憚行父名大夫也而猶若是先王之
澤盡矣


莒弑其君庶其

陸氏纂例稱國以弑自大臣也

晉弑其君州蒲之類凡四莒吳薛

呂氏曰稱國以弑自大臣也其君則亦惡加夫一國
也

春秋集解卷十四



覆校官庶吉士臣茅元銘

校對官庶吉士臣閔惇大

謄錄監生臣楊仁基

欽定四庫全書薈要

經部

春秋集解卷十五



欽定四庫全書薈要卷一千三百九十九

經部

春秋集解卷十五

宋 呂本中 撰

宣公

名倭或作接文公子匡王五年即位謚法善問周達曰宣

元年春王正月公即位

公羊傳繼弑君不言即位此其言即位何其意也

高郵孫氏曰桓弑隱而立春秋月而不王以罪天王之不能誅宣公弑子赤而立其罪同於桓公春秋

書月書王不罪天王之不討者非赦之也天下無
王自平王而下至於桓公王道之不行未久也聖
人一十八年之間書王者四始終反覆欲其見討
而竟不能於是而不王以為法於萬世至宣公則
王道之不行百餘年矣亂臣賊子接迹以起而王
者未嘗誅之非天下之無王何至是也惟其無王
是以書王耳春秋於桓宣之惡非偏有輕重以桓
公之時王猶可望而宣公之時竟無王也王猶可

望則可以待王之誅後竟無王於是書王以討之也

武夷胡氏傳宣公為弑君者所立受之而不討賊是亦聞乎弑也故如其意焉而書即位以著其自立之罪而不嫌於同詞美一也有大小則褒詞異惡一也有大小則貶詞異一美一惡無嫌於同

公子遂如齊逆女

杜氏注不譏喪娶者不待貶絕而自明也

武夷胡氏傳魯秉周禮喪未期年遣卿逆女何亟乎
太子赤齊出也仲遂殺子赤及其母弟而立宣公
懼於見討故結婚於齊為自安計越典禮以逆之
如此其亟而不顧者必敬嬴仲遂請齊立接之始
謀也其後滕文公定為三年喪父兄百官皆不欲
曰吾宗國魯先君莫之行也喪紀寢廢夫豈一朝
一夕之故自文宣莫之行矣此所謂不待貶絕而
罪惡見者也

三月遂以夫人婦姜至自齊

公羊傳何以不稱公子一事而再見者卒名也

何氏注卒

竟也竟但舉名者省文

夫人何以不稱姜氏貶曷為貶譏喪娶

也喪娶者公也則曷為貶夫人內無貶於公之道也內無貶於公之道則曷為貶夫人夫人與公一體也其稱婦何有姑之辭也

穀梁傳其不言氏喪未畢故略之也

范氏注夫人不能以禮自固故

與有貶

武夷胡氏傳有不待貶絕而罪惡見者不貶絕以見
罪惡夫人與有罪焉則待貶而後見故不稱氏夫
人其如何知惡無禮如野有死麕能以禮自防如
草蟲愆期有待如歸妹之九四則可免矣凡稱婦
者其詞雖同立義則異逆婦姜於齊病文公也以
婦姜至自齊責敬嬴也敬嬴嬖妾私事襄仲以其
子屬之殺世適兄弟出主君夫人援成風故事即
以子貴為國君母斬焉在衰服之中請婚納婦而

其罪隱而未見也故因夫人至特稱婦姜以顯之
此乃春秋推見至隱著妾母當國用事為後世鑒
者也槩指為有姑之詞而不察其旨則精義隱矣
夏季孫行父如齊

左氏傳夏季文子如齊納賂以請會

武夷胡氏傳經書行父如齊而不言其故謂納賂以
請會者傳也經有不待傳而著者比事以觀斯得
矣下書公會齊侯于平州則知此會行父請之也

又書齊人取濟西田則知其請蓋以賂也雖微傳其事著矣諸侯立卿為公室輔猶屋之有楹也而謀國如此亦不待貶絕而惡自見者也不然以行父之勤勞恭儉相三君而無私積必能以其君顯名與晏嬰等矣

晉放其大夫胥甲父于衛

左氏傳晉人討不用命者放胥甲父于衛

杜氏注文
十二年戰

河曲不肯
薄秦於險而立胥克

公羊傳放之者何猶曰無去是云爾

何氏注
是是衛

常山劉氏曰諸侯專放大夫於義可乎唯罪輕於專殺耳

武夷胡氏傳秦晉戰于河曲撓曳駢之謀者趙穿也若討其不用命則當以穿為首止治軍門之呼偕貶可也而獨放胥甲父則以趙盾當國穿其族子而盾庇之也桃園之罪其志固形於此矣故稱國以放見晉政之在私門而成上侵為後戒也

公會齊侯于平州

左氏傳會于平州以定公位

杜氏注平州齊地在泰山牟縣西

武夷胡氏傳案左氏曰會于平州以定公位魯宣篡立踰年舉國臣子既從之矣若之何位猶未定而有待於平州之會也春秋以來弑君篡國者已列於諸侯之會則不復致討故曹人以此請負芻於晉夫篡弑之賊毀滅天理無所容於天地之間身

無存歿時無古今其罪不得赦也以列於會而不
復討是率中國為戎夷棄人類為禽獸此仲尼所
為懼春秋所以作也然欲定其位者魯宣公宜稱
及齊而曰會者討賊之法也凡討亂臣賊子必深
絕其黨而後為惡者孤矣

呂氏曰子赤卒夫人歸公即位逆女于齊又會齊侯
于平州齊人取濟西田雖欲不疑於人不可得也
已

公子遂如齊

左氏傳東門襄仲如齊拜成

武夷胡氏傳宣公篡立之罪仲遂主謀為首惡初請於齊遂為上客而並書介使者罪叔孫得臣不能為有無亦從之也大夫有以死爭者矣然削而不書者以叔仲惠伯死非君命失其所也遂及行父則一再見於經矣如齊拜成雖削之可也又再書於策者於以著其始終成就弑立之謀以戒後世

人臣或內交宮禁以固其寵或外結藩鎮以為之
援至於殺生廢置皆出其手而人主不悟者其慮
深矣凡此皆直書於策而義自見者也

六月齊人取濟西田

左氏傳齊人取濟西之田為立公故以賂齊也

杜氏注濟

西故曹地僖三十

一年晉文以分魯

伊川先生解宣公不義得國賂齊以求助齊受之以
助不義故書取不義不能保其土故不云我非為

彼強取故不諱不能有而失者皆諱

武夷胡氏傳魯人致賂以免討而書齊人取田者所以著齊罪春秋討賊尤嚴於利其為惡而助之者所以孤其黨夫齊魯鄰國盟主之餘業也子惡弑出姜歸而宣公立不能聲罪致討務寧魯亂首與之會是利其為惡而助之也弑君篡國人道所不容而貨賂公行免於諸侯之討則四隣諸侯胥為無父無君之輩其禍乃自不知以義為利而以利

之可以為利而為之也孟子為梁王極言利國者
必至於弑奪而後饜蓋得經書取田之意舉法如
此然後人知保義棄利亂臣賊子孤立無徒而亂
少弭矣

襄陵許氏曰桓公既弑以許田賂鄭宣公既弑以濟
西田賂齊夫負不義於天下則所藉以行者唯利
而已凡非利不取者則亦何義之與擇至於弑父
與君將無不合也是以桓宣之計若出一軌春秋

志之以見世平則正與法皆勝世變則亂與賂俱
行自然之符可不戒諸

秋邾

公作邾婁

子來朝

楚子鄭人侵陳遂侵宋

穀梁傳遂繼事也

武夷胡氏傳楚書爵而人鄭者貶之也鄭伯本以宋
人弑君晉不能討受賂而還以此罪晉為不足與
也遂受盟於楚今乃附楚以亟病中國何義乎書

侵陳遂侵宋者以見潛師掠境肆為侵暴非能聲
宋罪而討之也既正此師為不義然後中國之師
可舉矣

晉趙盾帥師救陳宋公陳侯衛侯曹伯會晉師于襄

公作

裴
林伐鄭

左氏傳宋人之弑昭公也晉荀林父以諸侯之師伐
宋宋及晉平宋文公受盟於晉又會諸侯于扈將
為魯討齊皆取賂而還鄭穆公曰晉不足與也遂

受盟於楚陳共公之卒楚人不禮焉陳靈公受盟
於晉秋楚子侵陳遂侵宋晉趙盾帥師救陳宋會
于棐林以伐鄭也楚為賈救鄭遇于北林囚晉解
揚晉人乃還

杜氏注棐林鄭地滎陽宛陵縣東南有林鄉

泰山孫氏曰此晉趙盾帥師救陳致宋公陳侯衛侯
曹伯于棐林伐鄭也經言宋公陳侯衛侯曹伯會
晉師于棐林伐鄭者不與趙盾致四國之君也

武夷胡氏傳鄭在王畿之內而附蠻夷陳先代帝王
之後而見侵逼此門庭之寇利用禦之者也晉能
救陳則存諸夏尊周室之師故特褒而書救凡書
救者未有不善之也如解倒懸如拯民於塗炭之
中知此義則知春秋用兵之意矣傳稱師救陳宋
經不書宋此非闕文乃聖人削之也前方以不能
討宋上卿貶而稱人諸侯會而不序今若書救宋
則典型紊矣列數諸侯而會晉趙盾穀梁子以為

大趙盾之事以其大之也故曰師此說非也春秋
立法君為重而大夫與師其體敵列數諸侯於帥
師之下而又書大夫之名氏則臣疑於君而不可
以為訓其曰會晉師此乃謹禮於微之意也其立
義精矣裴林鄭地也前者地而後伐以為疑詞此
其地則以著其美者一美一惡無嫌於同

冬晉趙穿帥師侵崇

公作
柳

左氏傳晉欲求成於秦趙穿曰我侵崇秦急崇必救

之

杜氏注崇秦之與國

吾以求成焉冬趙穿侵崇秦弗與成

武夷胡氏傳崇在西土秦所與也晉欲求成於秦不以大義動之而伐其與國則為諉已甚比諸伐楚以救江異矣而傳謂設此謀者趙穿也意者趙穿已有逆心欲得兵權託於伐國以用其衆乎不然何謀之迂而當國者亦不裁正而從之也穿之名姓自登史策弑君於桃園而上卿以志同受惡其端又見於此書侵以見所以求成者非其道矣

晉人宋人伐鄭

左氏傳晉人伐鄭以報北林之役於是晉侯侈趙宣子為政驟諫而不入故不競於楚

武夷胡氏傳宋人弑君既列於會春秋哀世已免於諸侯之討矣論春秋王法則其罪固在法所不赦也而晉人與之合兵伐鄭是謂以燕伐燕庸愈乎其書晉人宋人非將卑師少蓋貶而人之也以貶書伐者若曰聲罪致討而已有瑕則何以伐人

矣

二年春王二月壬子宋華元帥師及鄭公子歸生帥師
戰于大棘宋師敗績獲宋華元

左氏傳鄭公子歸生受命於楚伐宋宋華元樂呂御
之二月壬子戰于大棘宋師敗績囚華元

杜氏注大棘在陳留襄邑縣南

武夷胡氏傳兩軍接刃主將見獲其負明矣又書師
敗績詞不贅乎此明大夫雖貴與師等也故將尊

師少稱將不稱師師衆將卑稱師不稱將將尊師衆並書於策者示人君不可輕役大衆又重將帥之選其義深矣或曰元帥三軍之司命而輕重若是班乎自行師而言則以元帥為司命自有國而言則以得衆為邦本鄭使高克將兵禦狄於境欲遠克也而不恤其師楚以六卒實從得臣恐喪師也而不恤其將故經以棄師罪鄭以殺其大夫責楚明此義然後知王者之道輕重之權衡矣

秦師伐晉

左氏傳秦師伐晉以報崇也遂圍焦

武夷胡氏傳案左氏以報崇也遂圍焦晉用大師於崇乃趙穿私意而無名也故書侵秦人為是興師而報晉則問其無名之罪也故書伐世豈有欲求成於強國而侵其所與可以得成者乎穿之情見矣宣子當國莫無遺策獨懵於此哉其從之也而盾之情亦見矣春秋書事筆削因革必有以也一

侵一伐而不書圍焦所以誅晉卿上侵之意其所
由來者漸矣

襄陵許氏曰自襄至悼六伐晉獨此稱師則靈之季
不競甚矣

夏晉人宋人衛人陳人侵鄭

左氏傳夏晉趙盾救焦遂自陰地及諸侯之師侵鄭
以報大棘之役楚鬬椒救鄭曰能欲諸侯而惡其
難乎遂次於鄭以待晉師趙盾曰彼宗競於楚殆

將斃矣姑益其疾乃去之

武夷胡氏傳案左氏晉趙盾及諸侯之師侵鄭以報大棘之役初鄭歸生受命於楚以伐宋經不書伐而以宋華元主大棘之戰者蓋楚人有詞於宋矣師之老壯在曲直晉主夏盟盾既當國合諸侯之師何畏乎楚何避乎鬪椒然力非不足而去之者以理曲也故卿不氏而稱人師書侵而不言伐易於訟卦之象曰君子作事謀始始而不謀將至於

興師動衆有不能定者矣晉唯取賂釋宋而不討
至以中國之大不能服鄭不競於楚可不慎乎春
秋行事必正其本為末流之若此也其垂戒明矣

秋九月乙丑晉趙盾弑其君夷臯

公作
獐

左氏傳晉靈公不君厚斂以雕牆從臺上彈人而觀
其辟丸也宰夫胹熊蹯不熟殺之趙宣子驟諫公
患之使鉏麇賊之晨往寢門闢矣盛服將朝尚早
坐而假寐麇退歎而言曰不忘恭敬民之主也賊

民之主不忠棄君之命不信有一於此不如死也
觸槐而死秋九月晉侯飲趙盾酒伏甲將攻之其
右提彌明知之遂扶以下鬪且出提彌明死之乙
丑趙穿攻靈公於桃園宣子未出山而復太史書
曰趙盾弑其君以示於朝宣子曰不然對曰子為
正卿亡不越竟反不討賊非子而誰宣子使趙穿
逆公子黑臀於周而立之

辨疑曰董狐云亡不越竟言行未遂遠而君被

殺反又不討賊狀涉同謀耳非謂越竟即無罪也

高郵孫氏曰趙盾之為大夫於晉其執政之久且專
如此靈公無道而欲殺盾者數矣族人弑君而盾
反不討又與之並立於朝然則弑君者誰歟盾也
若盾者蓋陰弑其君而陽逃其跡實行其計而穿
受其名者也有執政之久其賢聞於國人而靈公
無道滋欲殺之出奔未遠而其族人乘國人之不
悅而弑之盾反討賊猶未免也況不討乎春秋弑
君多矣不必其身弑之他人弑之而已受其福者

孔子皆以弑賊誅之不論其同謀不同謀也弑隱公者公子翬也桓公被弑君之罪弑子赤者公子遂也而宣公受弑君之名必待其親弑然後罪之則姦臣賊子得以計免而庸愚無知者常當其實也

武夷胡氏傳趙穿手弑其君董狐歸獄於盾其斷盾之獄詞曰子為正卿亡不越境反不討賊以是書斷而盾也受其惡而不敢辭仲尼因其法而不之

革其義云何曰亡而越境謂去國而不還也然後
君臣之義絕反而討賊謂復讎而不釋也然後臣
子之事終不然是盾偽出而實聞乎故也假令不
與聞者而縱賊不討是有無將之心而意欲穿之
成乎弑矣惡莫慘乎意今以此罪盾乃閑臣子之
邪心而謹其漸也微夫子推見至隱垂法後世亂
臣賊子皆以詭計獲免而至愚無知如史太鄧扈
樂之徒皆蒙歸獄而受戮焉君臣父子不相夷以

至於禽獸也幾希

襄陵許氏曰討賊發於忠憤嘗藥生於孝愛如擊其首而手應如徒跣疾馳而目視夷險有不待思焉而得勉焉而至者矣盾不討賊止不嘗藥此其不遂於理非其智之罪也所以誠其心於忠孝者有不至也

冬十月乙亥天王崩

公羊傳何休注匡王

三年春王正月郊牛之口傷改卜牛牛死乃不郊猶三望

左氏傳不郊而望皆非禮也望郊之屬也不郊亦無望可也

公羊傳曷為不復卜養牲養二卜帝牲不吉則扳稷牲而卜之帝牲在於滌三月於稷者唯具是視郊則曷為必祭稷王者必以其祖配王者則曷為必以其祖配自內出者無匹不行自外至者無主不

止

武夷胡氏傳乃不郊為牛之口傷改卜牛而牛又死
也不然郊矣禮為天王服斬衰周人告喪於魯史
策已書而未葬也祀帝於郊夫豈其時而或謂不
以王事廢天事禮乎春秋以來喪紀寢廢有不奔
王喪而遠適他國有不修弔禮而自相聘問固將
以是為可舉而不廢也卒至漢文以日易月後世
不能復其所由來漸矣春秋備書其義自見三望

者公羊曰祭泰山河海夫天子有天下凡宇宙之內名山大川皆其所主也故得祭天而有方望無所不通諸侯有一國則境外之山川他人所主者而可以望乎季氏旅於泰山冉求不能救而夫子責之者為泰山魯侯所主也大夫何與焉季氏不得旅泰山則河海非魯之封內其不得祭亦明矣猶者可已不當為之詞

葬匡王

杜氏注四月而葬速

武夷胡氏傳四月而葬王室不君其禮略也微者往會魯侯不臣其情慢也或曰宣公親之者也而常事不書非矣崩葬始終之大變豈以是為常事而不書也

楚子伐陸

公作賁

渾之

公穀無之字

戎

左氏傳楚子伐陸渾之戎遂至於雒觀兵於周疆定王使王孫滿勞楚子楚子問鼎之大小輕重焉對

曰在德不在鼎

武夷胡氏傳夷狄相攻不志此其志何也為陸渾在
王都之側戎夏雜處族類之不分也楚又至雒觀
兵於周疆問鼎之大小輕重焉故特書於策以謹
華夷之辨禁猾夏之階

夏楚人侵鄭

左氏傳晉侯伐鄭及邲鄭及晉平士會入盟夏楚人
侵鄭鄭即晉故也

武夷胡氏傳案左氏晉侯伐鄭鄭及晉平而經不書者仲尼削之也鄭本以晉靈不君取賂釋賊為不足與似也而往從楚非矣今晉成公初立背僭竊偽邦而歸諸夏則是反之正也春秋大改過許遷善書楚人侵鄭者與鄭伯之能反正也故獨著楚人侵掠諸夏之罪爾鄭既見侵於楚則及晉平可知矣

秋赤狄侵齊

襄陵許氏曰楚侵其南狄侵其北此中國大過棟撓之時也

宋師圍曹

左氏傳宋文公即位三年殺母弟湏及昭公子武氏之謀也使戴桓之族攻武氏於司馬子伯之館盡逐武穆之族以曹師伐宋秋宋師圍曹報武氏之亂也

冬十月丙戌鄭伯蘭卒葬鄭穆公

左氏傳冬鄭穆公卒

四月春王正月公及齊侯平莒及邾莒人不肯公伐莒
取向

左氏傳公及齊侯平莒及邾莒人不肯公伐莒取向
非禮也平國以禮不以亂伐而不治亂也以亂平
亂何治之有無治何以行禮

杜氏注向莒邑東海承縣東南有向城遠疑也

劉氏傳何言乎莒人不肯公伐莒取向譏何譏爾平

莒及邾義也莒人不肯吾有不義焉伐莒強也取
向利也非君子之道也君子之道猶射射者正已
而發發而不中不怨勝已者反求諸已而已矣

高郵孫氏曰春秋之義不以有功沒其過不以不正
治人之邪楚人殺陳夏徵舒則為義入陳則無道
矣平莒及邾則近正伐莒取向則有罪矣

武夷胡氏傳心不偏黨之謂平以此心平物者物必
順以此心平怨者怨必釋惟小人不能宅心之若

是也雖以勢力強之而有不獲成者矣夫以齊魯
大國平郊莒小邦宜其降心聽命不待文告之及
也然而莒人不肯則以宣公心有所私係失平怨
之本耳故書及書取以著其罪及所欲也平者成
也取者盜也不肯者心弗允從莫能強之者也以
利心圖成雖強大者不能行之於弱小春秋書此
戒後世之不知治其本者故行有不得者反求諸
已斯可矣

秦伯稻卒

夏六月乙酉鄭公子歸生弑其君夷

左氏傳楚人獻黿於鄭靈公

杜氏注穆公太子夷也

公子宋與

子家將見子公之食指動以示子家曰他日我如此必嘗異味及入宰夫將解黿相視而笑公問之
子家以告及食大夫黿召子公而弗與也子公怒
染指於鼎嘗之而出公怒欲殺子公子公與子家
謀先子家曰畜老猶憚殺之而况君乎反譖子家

子家懼而從之夏弑靈公

陸氏微言淳間於師曰子公弑君之賊也其惡易知矣子家縱其為逆罪莫大焉書之以為首惡所以教天下之為人臣者也春秋之作聖人本以明微蓋謂此也此與書趙盾之弑義同

武夷胡氏傳首謀弑逆者公子宋也懼譖而從之者歸生也而以歸生為首惡何也夫亂臣賊子欲動其惡而不從者未有能全其身而不死也故季子

然問仲由冉求其從之者與子曰弑父與君亦不從也是以死節許二子矣歸生懼譖而從公子宋特無求路不可奪之死節耳書為首惡不亦過乎曰歸生與宋並為大夫乃貴戚之卿同執國政可以不從一也嘗統大師與宋戰獲其元帥已得兵權可以不從二也聞宋逆謀登時而覺先事誅之猶反手耳夫據殺生之柄仗大義以制人使人聽已猶犬羊之伏於虎也何畏於人懼其見殺而從

之也哉計不出此願以畜老憚殺比方君父歸生
之心悖矣故春秋舍公子宋而以弑君之罪歸之
為後世鑒若司馬亮沈慶之等苟知此義則能討
罪人不至於失身為賊所制矣

赤狄侵齊

秋公如齊公至自齊

武夷胡氏傳君行告至常事不書宣公比年如齊而
皆致者危之也夫以篡弑謀於齊而取國以土地

賂齊而請會以卑屈事齊而求安上不知有天王
下不知有方伯惟利交是奉而可保乎高固之事
亦殆矣故比年如齊而皆致以戒後世之欲利有
攸往者惟義之與比為可安耳

冬楚子伐鄭

左氏傳冬楚子伐鄭鄭未服也

五年春公如齊夏公至自齊

左氏傳公如齊高固使齊侯止公請叔姬焉夏公至

自齊書過也

秋九月齊高固來逆

公穀有子字

叔姬

左氏傳齊高固來逆女自為也故書曰逆叔姬卿自逆也

穀梁傳諸侯之嫁子於大夫主大夫以與之來者接內也不正其接內故不與夫婦之稱也

范氏注高固齊之大

夫而今與君接婚姻之禮故不言逆女

陸氏纂例春秋時有子叔姬者三公羊穀梁皆云同

母娣妹非也據稱子直為時君之子以別先君之子耳或云若是文公女不應有兩叔姬案伯仲之外餘稱叔故管叔蔡叔等即其例也

武夷胡氏傳案左氏公如齊高固使齊侯止公請叔姬焉書夏公至自齊秋齊高固來逆子叔姬罪宣公也其曰來者以公自為之主稱子者或謂別於先公之女也諸侯嫁女於大夫主大夫以與之者為體敵也而公自為之主壓尊毀列卑朝廷慢宗

廟矣夫以鄭國褊小楚公子圍之貴驕強大來娶
於鄭子產辭而却之使館於外欲野賜之幾不得
撫有其室而宣公以魯國周公之後逼於高固請
婚其女强委禽焉而不能止惟不知以禮為守身
之幹是以得此辱也春秋詳書為後世鑒欲人之
必謹於禮以定其位不然卑巽妄說不近於禮奚
足遠恥辱哉

叔孫得臣卒

冬齊高固及子叔姬來

左氏傳冬來反馬也

武夷胡氏傳左氏曰反馬也禮嫁女留其送馬不敢
自安及廟見成婦遣使反馬則高固親來非禮也
又禮女子有行遠父母者歲一歸寧今見逆逾時
未易歲也而叔姬亟來亦非禮也故書及書來以
著齊罪也大夫適他國必有君命與公事否則禮
法之所禁而可犯乎惠公許其臣越禮恣行而莫

遇高固委其君踰境自如而不忌則人欲已肆矣
凡婚姻常事不書而書此者則以為非常為後世
戒也

楚人伐鄭

左氏傳楚子伐鄭陳及楚平晉荀林父救鄭伐陳
六年春晉趙盾衛孫免侵陳

左氏傳晉衛侵陳陳即楚故也

武夷胡氏傳案傳稱陳及楚平荀林父伐陳經皆不

書者以下書晉衛加兵於陳即陳及楚平可知矣
以趙盾孫免書侵即林父無詞可稱亦可知矣愛
人不親反其仁治人不治反其智晉嘗命上將帥
師救陳又再與之連兵伐鄭今而即楚無乃於已
有缺盍亦自反可也不內省德遽以兵加之則非
義矣故林父不書伐而盾免書侵以正晉人所以
主盟非其道也

襄陵許氏曰外志侵伐從兵書卿始於宣六年會討

書卿始於襄元年從兵書卿帥師始於襄十年然
終春秋世三國而止未有書卿帥師侵曰伐者猶
戢之也說者以侵陳之役不書帥師委曲生意誤
矣

夏四月

秋八月螽

公作
螽

武夷胡氏傳先是公伐莒取向後再如齊伐萊軍旅
數起賦斂既繁戾氣應之矣夫善惡之感萌於心

而災祥之應見於事宣公不知舍惡遷善以補前
行之愆而用兵不息災異數見年穀不豐國用空
乏卒至改助法而稅民盖自此始矣經於蟲螟一
協之變必書於策示後世天人感應之理不可誣
當慎其所感也

冬十月

七年春衛侯使孫良夫來盟

左氏傳衛孫桓子來盟始通且謀會晉也

穀梁傳來盟者前定也

武夷胡氏傳來盟為前定者嘗有約言矣未足效信而釋疑又相敵血固結之爾是盟衛欲為晉致魯而魯專事齊初未與晉通也必有疑焉而衛侯任其無咎故遣良夫來為此盟而公卒見辱盟非春秋之所貴義自見矣

夏公會齊侯伐萊秋公至自伐萊

杜氏注萊國今東萊黃縣

武夷胡氏傳及者內為志會者外為主平莒及郟公
所欲也故書及繼以取向即所欲者可知矣伐萊
齊志也故書會繼以伐致即師行之危亦可知矣
公與齊侯俱不務德合黨連兵恃強陵弱是以為
此舉也

大旱

冬公會齊侯宋公衛侯鄭伯曹伯于黑壤

左氏傳鄭及晉平公子宋之謀也故相鄭伯以會冬

盟于黑壤王叔桓公臨之以謀不睦晉侯之立也
公不朝焉又不使大夫聘晉人止公于會盟于黃
父公不與盟以賂免

杜氏注黃父即黑壤

故黑壤之盟不書

諱之也

武夷胡氏傳會而不得見不以不得見為諱盟而不
與盟不以不與盟為諱則曲不在公而主會盟者
之罪耳與於會不與於盟而公有歉焉非主會盟
者之過也則書會不書盟若黑壤是也晉侯之立

公既不朝又不使大夫聘而每歲適齊是宣公行有不慊於心而非晉人之咎矣凡不直者臣為君隱子為父隱於以養臣子愛敬之心而不事盟主又以賂免則不直在已矣

八年春公至自會

夏六月公子遂如齊至黃乃復

公羊傳其言至黃乃復何有疾也何言乎有疾乃復譏何譏爾大夫以君命出聞喪徐行而不反

何氏注聞

喪者聞父母之喪徐行者不忍疾行又為君當使人追代之以喪喻疾者喪尚不當反況於疾乎

劉氏傳有疾也何言乎有疾乃復譏何譏爾大夫以君命出未致使而死以尸將事

武夷胡氏傳乃者無其上之詞其曰復事未畢也

辛巳有事于大廟仲遂卒于垂

左氏傳有事于大廟襄仲卒而繹非禮也

劉氏傳大夫卒稱名仲者字也其曰仲遂何譏何譏爾譏世卿世卿非禮也言自是世仲氏也

武夷胡氏傳有事言時祭此公子遂也曷為書字生而賜氏俾世其官也曷為書卒以事之變卒之也古者諸侯立家大夫卒而賜氏其後尊禮權臣寵遇貴戚而不由其道於是乎有生而賜氏其在魯則季友仲遂是也襄仲殺惡及視援立宣公而公深德之故生而賜氏俾世大夫以荅之也經於其卒書族以志變法之端為後世戒

壬午猶繹萬入去篇

公羊傳繹者何祭之明日也萬者何干舞也籥者何
籥舞也其言萬入去籥何去其有聲者廢其無聲
者存其心焉爾存其心焉爾者何知其不可而為
之也猶者何通可以已也

杜氏注魯人知卿佐之喪不宜作樂而不知廢繹故
內舞去籥惡其聲聞

武夷胡氏傳繹者祭之明日以賓尸也猶者可已之
詞萬舞也以其無聲也故入而遂用籥管也以其

有聲也故去而不作是謂故知不可存其邪心而
不能格也禮大夫卒當祭則不告終事而聞則不
繹不告者盡肅敬之誠於宗廟不繹者全始終之
恩於臣子今仲遂國卿也卒而猶繹則失寵遇大
臣之禮矣春秋雖隆君抑臣而體貌有加焉則廉
陛益尊而臣節礪後世法家專欲隆君而不得其
道至於犬馬國人相視大倫滅矣聖人書法如此
存君臣之義也

戊子夫人嬴

公穀作熊

氏薨

杜氏注宣公母也

武夷胡氏傳敬嬴文公妾也何以稱夫人自成風聞季友之繇事友而屬其子及僖公得國立以為夫人於是乎嫡妾亂矣春秋於風氏凡始卒四敗之則禘於大廟秦人歸祿榮叔含贈召伯會葬去其姓氏不稱夫人王再書而無天是也敬嬴又嬖私事襄仲而屬宣公不待致於大廟援例以立則從

同同而無貶矣其意若曰以義起禮為可繼苟出於私情而非義後雖欲正可若何

晉師白狄伐秦

左氏傳白狄及晉平夏會晉伐秦

武夷胡氏傳晉主夏盟糾合諸侯攘夷狄安諸夏乃其職矣秦人之怨起自侵崇其曲在晉責已可也既不知自反釋怨修睦以補前過已可咎矣乃復興師動衆會戎狄以伐之獨不惡傷其類乎直書

於策貶自見矣

楚人滅舒蓼

穀作鄧

左氏傳楚為衆舒叛故伐舒蓼滅之楚子疆之及滑
汭盟吳越而還

武夷胡氏傳案詩稱戎狄是膺荆舒是懲在周公所
懲者其自相攻滅中國何與焉然春秋書而不削
者是時楚人疆舒蓼及滑汭盟吳越勢益强大將
為中國憂而民有被髮左社之患矣經斯世者當

以為懼有攘却之謀而不可忽則聖人之意也

秋七月甲子日有食之既

杜氏注月三十日食

襄陵許氏曰董仲舒劉向以為先是楚商臣弑父而立至於莊王遂強諸夏大國惟有齊晉齊晉新有篡弑之禍內皆未安故楚乘弱橫行八年之間六侵伐而一滅國伐陸渾戎觀兵周室後又入鄭鄭伯肉袒謝罪北敗晉師于邲流水血色圍宋九月

析骸而炊之

冬十月己丑葬我小君敬嬴

公穀作頃熊

雨不克葬庚寅日

中而克葬

穀梁傳葬既有日不為雨止禮也雨不克葬喪不以制也

杜氏注敬謚嬴姓也

武夷胡氏傳成風薨以夫人葬以小君將祔於廟而始有二夫人也則四貶之以正其事今敬嬴亦薨

以夫人葬以小君使祔於廟無貶以正之從同同
可也而於宣公元年即以所逆穆姜婦之何也曰
婦有姑之詞見敬嬴遂以子貴援例而亟立為夫
人也僖公享國八年然後致成風而敬嬴之亟也
雖云援例魯君臣之責亦可知矣無貶而書法若
此者猶桓宣弑君而書即位爾

又曰敬嬴以其子宣公屬諸襄仲殺太子及其母弟
雖假手於仲實敬嬴之謀也經書子赤卒夫人姜

氏歸于齊其文無貶而讀者有傷切之意焉則以
秉彝不可滅也傳說哭而過市市人皆哭敬嬴逆
天理拂人心之狀慘矣其於終事雨不克葬著咎
徵焉而謂無天道乎此皆直書以見人心與天理
之不可誣者也夫喪事即遠有進無退浴于中雷
飯于牖下小斂于戶內大斂于阼階殯于客位遷
于廟祖于庭塋于墓以弔賓則其退有節以虞事
則其祭有時不為雨止禮也雨不克葬喪不以制

也或曰卜葬先遠日所以避不懷也諸侯相朝與
旅見天子入門而雨雪服失容則廢矧送終大事
人情所不忍遽者反可冒雨不待成禮而葬乎潦
車載蓑笠士喪禮也有國家者乃不能為雨備何
也且公庭之於墓次其禮意固不同矣不得不可
以為悅無財不可以為悅得之為有財古之人皆
用焉而不能為之備是儉其親也不亦薄乎故穀
梁子曰雨不克葬喪不以制也厚葬古人之所戒

而墨之治喪也以薄又君子之所不與故喪事以制春秋之旨也

襄陵許氏曰子惡之弑謀自敬嬴故春秋因其雨不克葬而著咎徵焉君子於是乎知有天道

城平陽

杜氏注今泰山有平陽縣

襄陽許氏曰國有大喪始葬而又動衆城邑非特不愛民力以公為忘親愛矣不時孰甚焉

楚師伐陳

左氏傳陳及晉平楚師伐陳取成而還

九年春王正月公如齊公至自齊

泰山孫氏曰公有母喪而遠朝強齊公之無哀也甚矣

夏仲孫蔑如京師

左氏傳春王使來徵聘夏孟獻子聘於周王以為有禮厚賄之

武夷胡氏傳以淺言之屬辭比事春秋教也當歲首
月公朝於齊夏使大夫聘于京師此皆比事可考
不待貶絕而惡自見者也宣公享國九年於周纔
一往聘其在齊則又再朝矣經於如齊每行必致
深罪之也下逮戰國周衰甚矣齊威王往朝於周
而天下皆賢之況春秋時乎而宣公不能也故聘
覲之禮廢則君臣之位失諸侯之行惡而倍畔侵
陵之敗起矣此經書君如齊臣如周之意而特書

王正月以表之也

齊侯伐萊

襄陵許氏曰狄比侵齊齊不敢報萊不犯齊而齊亟伐之畏衆強而虐輕弱此可以觀惠公矣

秋取根牟

左氏傳言易也

杜氏注根牟東夷國也今琅邪陽都縣東有牟鄉
劉氏傳根牟者何附庸之國也

八月滕子卒

左氏傳秋滕昭公卒

九月晉侯宋公衛侯鄭伯曹伯會于扈晉荀林父帥師伐陳

辛酉晉侯黑臀卒于扈

左氏傳討不睦也

杜氏注
謀齊也

陳侯不會

杜氏注前年
與楚成故

晉

荀林父以諸侯之師伐陳晉侯卒于扈乃還

杜氏注卒於竟外故書地

武夷胡氏傳案左氏討不睦也陳侯不會荀林父以諸侯之師伐陳晉侯卒乃還則知經所書者與晉罪陳之詞也會于扈以待陳而陳侯不會然後林父以諸侯之師伐之也則幾於自反而有禮矣不書諸侯之師而曰林父帥師者在會諸侯皆以師聽命而林父兼將之也則其衆輯矣晉主夏盟又嘗救陳所宜與也而惟楚之即夫豈義乎

陸氏纂例案國君不卒於其國例書地

冬十月癸酉衛侯鄭卒

武夷胡氏傳晉成公何以不葬魯不會也衛成公何以不葬亦魯不會也衛成事晉甚謹而魯宣公獨深向齊衛欲為晉致魯故謀黑壤之會而特使孫良夫來盟以定之也及會于黑壤而晉人止公賂然後免是以扈之會皆前日諸侯而魯獨不往二國繼以喪赴亦皆不會此所謂無其事而闕其文者也或曰二君皆有貶焉故不書葬誤矣魯人不

會亦無貶乎書卒而以私怨廢禮忘親其罪已見
春秋文簡而直視人若日月之無私照也曲生意
義失之遠矣

宋人圍滕

左氏傳因其喪也

武夷胡氏傳圍國非將卑師少所能辦也必動大衆
而使大夫為主帥明矣然而稱人是貶之也滕既
小國又方有喪所宜矜哀弔恤之不暇而用兵草

以圍之比事以觀知見貶之罪在不仁矣

楚子伐鄭晉卻缺帥師救鄭

左氏傳楚子為厲之役故伐鄭晉卻缺救鄭鄭伯敗
楚師于柳林國人皆喜唯子良憂曰是國之災也
吾死無日矣

武夷胡氏傳楚兵加鄭數矣或稱人或稱爵何也鄭
自晉成公初立舍楚而從中國正也楚人為是興
師而加鄭不義矣故宣公三年書人書侵罪之也

次年鄭公子歸生弑其君諸侯未有聲罪致討者而楚師至焉故特書爵與之也然興師動衆賊則不討惟服鄭之為事則非義舉矣故又次年傳稱楚子伐鄭而經書人再貶之也至是稱爵豈與之乎案公羊傳君將不言帥師書其重者也至此書爵見其陵暴中華以重兵臨鄭矣何以知其非與之乎曰下書晉卻缺帥師救鄭則知非與之也由此觀春秋書法皆欲治亂賊之黨謹華夷之辨以

一字為褒貶深切著明矣

陳殺其大夫洩

公穀
作泄冶

左氏傳陳靈公與孔寧儀行父通於夏姬皆衷其相服以戲於朝洩冶諫曰公卿宣淫民無效焉且聞不令君其納之公曰吾能改矣公告二子二子請殺之公弗禁遂殺洩冶


武夷胡氏傳稱國以殺者君與用事大臣同殺之也稱其大夫則不失官守而殺之者有專輒之罪矣

洩治無罪而書名何也治以諫殺身者也殺諫臣者必有亡國弑君之禍故書其名為徵舒弑君楚子滅陳之端以垂後戒此所謂義係於名而書其名者也比干諫而死子曰商有三仁焉洩治諫而死而獨無褒詞夫語默死生當其可而止爾洩治之盡言無隱不媿夫史魚之直矣方諸比干自靖自獻于先王則未可同日而語也治雖效忠其猶在宋子哀魯叔肝之後乎故仕於昏亂之朝若異

姓者如子哀潔身而去可也其貴戚邪不食其祿
如叔肝善矣

襄陵許氏曰書殺洩冶張陳亡之本也

春秋集解卷十五



覆校官庶吉士臣茅元銘

校對官庶吉士臣閔惇大

謄錄監生臣徐維